

## Listovi...

## Listovi gračaničkog kalendara od 10. 11. 2001. do 1. 5. 2002. godine

Pages of Gracanica's  
calendar

*29. 11. 2001.*

**Sedamnaesta sjednica Općinskog  
vijeća: ponuda kulturnih sadržaja  
dobila pozitivnu ocjenu**

Pored nekoliko zakonskih projekata s kantonalnog nivoa (o RTV TK, o lokalnoj samoupravi) i nekoliko odluka od značaja za općinu (iz oblasti urbanizma, o statusu "Gradske apoteke" i dr.), vijećnici su raspravljali i "o stepenu razvoja kulturnog stvaralaštva i realizaciji programa kulturnih manifestacija na području općine Gračanica u 2001. godini". U okviru pet kulturnih manifestacija: "Dani BKC" (mart, april i maj), "Kulturno ljeto", "Festival humora i satire" i "Revije filmova sa Sarajevskog filmskog festivala" (do kraja godine slijedi i manifestacija "Gračanička zima"), izvedeno je nekoliko pozorišnih predstava, više kulturno-umjetničkih programa ovdašnjih škola i kulturno-umjetničkih društava, zatim likovne izložbe, promocije knjiga i nastupi domaćih pisaca, filmske predstave itd. U njihovoj realizaciji učestvovali su: Bosanski kulturni centar, KUD "Adem Alić", Bošnjačka zajednica kulture "Preporod" kao i drugi stvaraoци iz oblasti kulture na području općine Gračanica. U narednom periodu gračanička publika očekuje još kvalitetnije kulturne sadržaje, uz primjedbu vijećnika da ih valja "dislocirati" i na teren.

*6. 12. 2001.*

**Počela sanacija Stare apoteke**

...koja je izgorjela u požaru početkom ove godine. Riječ je o jednoj od najstarijih

"Listao" Omer Hamzić

zgrada u Gračanici, koja je od posebne ambijentalne vrijednosti i značaja za Gračanicu. Sanaciju finansiraju vlasnici objekta, a pomoć je pružila i općina Gračanica.

7. 12. 2001.

### Ponovo se čuje ezan u Grapskoj

Nikada mještani ovog bošnjačkog sela neće zaboraviti 10. maj 1992. godine, divljački napad, paljevine, smrt. Ostala su zgarišta, 32 mještana ubijena na licu mjesta, 400 odvedeno u logore, ostali protjerani u pravcu Lukavice i Gračanice. Prije dvije godine počeo je povratak i obnova ovog sela. Do danas se, kako piše Hasan Čalić u "Dnevnom avazu", vratilo 300 porodica u 250 obnovljenih kuća, dovršena je zgrada osnovne škole, in toku je sanacija mjesnog vodovoda, njive se pripremaju za proljetnu sjetvu. Ovog ramazana teravih-namaz mještani klanjaju u novoizgrađenoj džamiji, selo vrijednih domaćina diže se iz pepela...

10. 12. 2001. godine

### Međunarodni sajam namještaja u Moskvi – priznanje za kvalitet gračaničkoj "Jadrini", povećana proizvodnja, ambiciozni planovi

Vrijednost ovogodišnje proizvodnje u tom preduzeću iznosi 8,5 miliona DM. (20% više nego lani). Izvoz na zapadno tržište 2,2, miliona DM: Italija, Njemačka, Francuska, Norveška... Tajna uspjeha: kvalitet i širok asortiman proizvodnje, prilagođen zapadnoevropskom tržištu. Deviza: "Izvoziti ili propasti". Kolektiv od 284 radnika spokojno ulazi u narednu poslovnu godinu. Planirana je proizvodnja u vrijednosti od 11. miliona DM, što je više za 25% u odnosu na 2001. "Naš strateški cilj bio je da okončamo privatizaciju u kojoj će radnici kupiti fabriku, što se i desilo. Kupili su je za certifikate i sada je u svakom momentu osjećaju kao svoju, pa

se tako i odnose prema zadacima", izjavio je za "Dnevni avaz" prvi čovjek "Jadrine", inž. Ramiz Grapkić.

15. 12. 2001.

### Poslovanje gračaničkog "Grina" u 2001. godini – zadovoljavajuće

Na izvjestan podbačaj ostvarenja Plana proizvodnje, u odnosu na planske veličine za 2001. godinu (u iznosu od 3 miliona KM), prema izjavi za Radio Gračanicu direktora ove firme Hajrudina Čudića, uticali su takozvani vanjski i unutrašnji faktori. Radi se o sužavanju tržišta i nelojalnoj konkurenciji kao i unutrašnjim problemima koji su danas karakteristični za svako bivše državno, odnosno društveno preduzeće (višak zaposlenih, visoki fiksni i režijski troškovi itd.). Privatizacija preduzeća je završena u najlošijoj varijanti – papirnato, bez novih ulaganja i bez strateškog partnera. Ipak, preduzeće ovu godinu završava uspješno - bez gubitaka. Predstoji dalje tehnološko osavremenjivanje i unutrašnja reorganizacija firme.

20. 12. 2001.

### Prvi novogodišnji sajam u Gračanici

Nakon tradicionalnog vašara, koji se održava svake godine na Mitrovdan (od 8. do 11. novembra), Gračanica je dobila i svoj prvi novogodišnji sajam, koji je organizovan u novoizgrađenoj sportskoj dvorani. Na sajmu je učestvovalo preko stotinu izlagača. U narednom periodu očekuje se organizacija Sajma male privrede u Gračanici. (Kompanija "Širbegović", Promo internacional i dr.)

22. 12. 2001.

### "Gračanički glasnik": promocija dvanaestog broja, promocija CD i on-line izdanja Časopisa

Pored članova Asocijacije "Soko", saradnika i čitalaca "Gračaničkog glasnika", više

uglednih kulturnih i javnih radnika sa općine Gračanica, u radu ovog skupa uzeli su učešća najodgovorniji općinski čelnici, te nekoliko uglednih gostiju iz Tuzle.

Nakon vrlo sadržajne rasprave, učesnici skupa pozdravili su donošenje Rezolucije o obnovi kulturno-historijskog naslijeđa na TK (koju je u septembru 2001. godine usvojila Skupština TK), te usvojili nekoliko konkretnih zaključaka, koji su dostavljeni odgovarajućim institucijama i javnosti.

26. 12. 2001.

### **Osamnaesta sjednica Općinskog vijeća Gračanica vijećnici pozitivno ocijenili rad općinskog načelnika Nusreta Helića u 2001. godini**

...i usvojili ostale programske i izvještajne dokumente za 2002. godinu, dodijelili 14 placeva članovima tzv. boračke populacije. U raspravi o Izvještaju o radu općinskog načelnika za 2001. godinu konstatovano je da su, i pored velikih teškoća, ostvareni glavni razvojni ciljevi na općini: zaposleno je oko 900 novih radnika, izvršena privatizacija u 23 od ukupno 25 preduzeća koja podliježu privatizaciji, realizovana su 23 projekta u 11 mjesnih zajednica iz oblasti komunalne infrastrukture, u ukupnoj vrijednosti od 2,7 miliona KM (najviše u puteve i vodosnabdijevanje), izgrađena sportska sala, izvršena je organizaciono-kadrovska konsolidacija općinskih službi (i njihovo informatičko opremanje), usklađen razvoj nekih društvenih djelatnosti sa realnim mogućnostima Budžeta, koji je ostvaren u iznosu od 3,7 miliona KM (plan je bio 4,8 miliona KM).

26. 12. 2001.

### **Gračanički vatrogasci uspješno ugasili požar u Petrovu na Ozrenu**

Odazvali su se na poziv tamošnjeg Štaba civilne zaštite (koji je stigao oko 22 sata),

čim su dobili odobrenje za intervenciju u drugom entitetu. Nisu, srećom, zakasnilo.

27. 12. 2001.

### **"Bosna" - tradicionalno stabilna trgovačka firma**

To potvrđuju podaci s kraja ove poslovne godine: 70 zaposlenih ostvarilo promet od 3,6 miliona KM u 20 poslovnih objekata, 14 objekata je dato pod zakup, 5 je još uvijek van funkcije i čeka adaptaciju. Radnici redovno primaju plaće, firma plaća sve svoje obaveze... Planovi za 2002. godinu: izgradnja robne kuće u centru Gračanice, koja je porušena u ratu, sanacija ostalih objekata.

8. 1. 2002.

### **Rekord gračaničkih obućara**

U 2001. godini proizveli su 900.000 pari obuće (više nego ikad), zaposlili 200 novih radnika i obezbijedili posao za 2002. godinu. Ostaje još da se završi privatizacija. Dolaze li to srećniji dani za "Fortunu!?"

10. 1. 2002.

### **U gračaničkom preduzeću "Index" - desetka iz predmeta "poslovanje"**

Počelo je prije rata kao mala metalska radionica u skućenim i neuslovnim prostorima i sa skromnim proizvodnim programom. Sada je to snažan i stabilan kolektiv sa 42 radnika, koji raspolaže kvalitetnom opremom i modernim poslovnim prostorima u Gračanici, ima uhodanu proizvodnju, tržište i kadrove, redovno isplaćuje plaće radnicima i obaveze državi... Vrsni inženjeri i iskusni majstori, koje predvodi osnivač i vlasnik firme Fahir Humić, garantuju kvalitet široke lepeze proizvoda za elektroprivredu, rudarstvo, procesnu industriju, ali i široku potrošnju. Pored proizvodnje, preduzeće se bavi i prometom originalnih rezervnih dijelova za teretna

vozila. Ima poslovnice u Sarajevu, Banja Luci, Zenici, Brčkom, Bihaću, uskoro će otvoriti svoja predstavništva u Novom Sadu i drugim gradovima na tom prostoru. Kako piše Hasan Čalić u "Dnevnom Avazu", preduzeće "Index" je generalni sponzor gračaničkog rukometnog šampiona BIH, pomaže gdje god zatreba, "a sve je više onih koji traže pomoć..."

11. 1. 2002.

### Gračanička mljekara "Sirko" - ima nade za proizvođače mlijeka

Otvorena u junu 2001. godine kao privatni projekat Huse Avdagića, mljekara se odmah suočila sa svim problemima koji prate i ostale proizvođače hrane na ovim prostorima: neloyalna konkurencija iz uvoza, izostanak zaštite domaće proizvodnje, kašnjenje premija i ostalih podsticaja države itd. Njen vlasnik, ipak, uspio je oko sebe okupiti proizvođače mlijeka iz Stjepan Polja, Malešića, Škahovice, Babića, Sladne i Klokotnice, pronaći tržište i stabilizovati proizvodnju širokog spektra proizvoda od mlijeka. Za prvih šest mjeseci rada mljekara je otkupila i preradila oko 600.000 litara mlijeka i, bez obzira na pomenute teškoće, stekla povjerenje svojih kupaca, ali i vodećih proizvođača mlijeka na ovom prostoru.

16. 1. 2002.

### Fabrika konfekcije "Olimp" u vlasništvu radnika

Privatizovano je oko 86% kapitala ove gračaničke mnogoljudne firme, koju su praktično otkupili njeni radnici i, po svemu sudeći, uspjeli stabilizirati proizvodnju. To su, uglavnom, takozvani "lon poslovi" za izvoz: Njemačka, Italija, Slovenija... Fabrika radi punim kapacitetom, ima posla za svih 510 zaposlenih radnika. Kupci su zadovoljni kvalitetom, ugovorena je

"nova sezona". "Naša firma se sve više učvršćuje na evropskom tržištu, ali mora hitno raditi na znavljanju svoje zastarjele tehnologije i opreme", izjavio je za Radio Gračanicu direktor ove firme Hasib Hasinović.

16. 1. 2002.

### Gračanica: izvršen izbor sportiste godine

*Sportska ekipa godine:* Malonogometni klub "Kaskada"; *sportista godine:* Ferid Dizdarević; reprezentativac i član "Kaskade" i "Bratstva"; *sportistkinja godine:* Amila Gopo, član Ženskog odbojkaškog kluba Gračanica; *sportski radnik:* Ibrahim Žunić, predsjednik Ženskog odbojkaškog kluba Gračanica; *sportista-invalid:* Salih Delić, član kluba "Veterani" iz Tuzle; *trener godine:* Jasmin Mrkonja, bivši trener Rukometnog kluba "Gračanica Index". Među svim izabranim sportistima, najveći uspjeh postigla je trinaestogodišnja Amila Gopo, kojoj već sada predviđaju blistavu sportsku karijeru.

25. 1. 2002.

### "Vegafruit" vlasnik 76% kapitala gradačačkog "Bosnaprodukta"

...koji je bio potpuno stao sa proizvodnjom. "Mi smo pokrenuli ovaj kolektiv, obučili radnike za proizvodnju ajvara, đuveča i sl. Uskoro ćemo primiti 50 novih radnika i kooperativnu proizvodnju na području Gradačca razviti sa 500 domaćinstava", izjavio je za "Dnevni avaz" direktor "Vege" Muharem Salihbašić.

11. 1. 2002.

### "Carski rez" - prvi put u Općoj bolnici u Gračanici

To je rezultat koji će, bez sumnje, biti zabilježen u historiji "mirnodopskog" razvoja gračaničkog zdravstva (takvu jednu

operaciju tokom rata izveo je dr. Hamdija Čerimagić u Vojnoj bolnici Soko). Ovoga puta "carski rez" izvela je ekipa ljekara u sljedećem sastavu: Ademir Šahinpašić, Munevera Šuvalić i Hajro Sajdović, te anesteziolog Hariz Hadžagić. Sretna majka bila je Hanifa Hodžić.

31. 1. 2002.

### **Devetnaesta sjednica Općinskog vijeća Gračanica: raport o utrošku sredstava za sanaciju posljedica prošlogodišnjih poplava**

...stipendije studentima i učenicima, inventura izvršenja vlastitih odluka i zaključaka, jutarnji program u novoj šemi Radio Gračanice. Za sanaciju posljedica, izazvanih prošlogodišnjim poplavama (koje su procijenjene na 12.296.000 KM), općina je imala na raspolaganju 370.560 KM. Za sanaciju oštećenih, gradnju novih i zaštitu postojećih objekata utrošeno je 205.436 KM, za sanaciju klizišta 50.063 KM, a za intervencije u toku trajanja elementarnih nepogoda 41.582 KM. Preostali iznos od 73.479 KM utrošit će se na saniranje vodotoka u mjesnim zajednicama. Stipendije u iznosu od 100 KM dobio je 21 student. Isto toliko učenika srednjih škola dobilo je stipendiju u iznosu od 50 KM. Odobrena je i nova šema Radio Gračanice, po kojoj ova informativna kuća, uz zadržavanje dosadašnjeg dnevnog i večernjeg programa, službeno uvodi i novi dvosatni jutarnji program, sa kojim je eksperimentalno "krenula" još 1. decembra 2001. godine.

14. 2. 2002.

### **Plastenici iz "Iplasta", bivšeg gračaničkog "Graplasta"**

Nakon uspješne privatizacije, u toj, nekada najvećoj ovdašnjoj "plastičarskoj firmi" (koja je, inače, bila pred kolapsom), nisu samo promijenili vlasnika i ime, već i proizvodni program. Počeli su proizvodnju ve-

likih plastenika, površine od 100 do 300 kvadratnih metara, koja će, sudeći po velikom interesovanju poljoprivrednika, snažno podstaknuti proizvodnju zdrave hrane i otvoriti novo zapošljavanje u poljoprivredi. Pedesetak radnika već je na poslu, plaće su redovne, gradi se nova hala za novi proizvodni program i nova radna mjesta.

20. 2. 2002.

### **Na petnaestom kilometru puta Gračanica – Malešići – Lukavica ponovo se "otisnula sjelina"**

Riječ je o najvećem od 142 zvanično registrovana klizišta na području općine Gračanica sa kojim se duže vremena "bore" mještani Lukavice. Kako piše novinar "Dnevnog avaza" Hasan Čalić, klizište, dužine 200 i širine 100 metara, prekinulo je veoma frekventnu komunikaciju između dvije općine (Gračanica i Doboj Istok) kao i više sela na tom prostoru. Tek je u pripremi njegova privremena sanacija. Trajno rješenje, po svemu sudeći, čekat će neka bolja vremena.

28. 2. 2002.

### **Dvadeseta sjednica Općinskog vijeća Gračanica: usvojen Budžet za 2002. godinu**

...kojim se planiraju prihodi u iznosu od 4.840.000 KM, što predstavlja povećanje od 29,5% u odnosu na obim ostvarenih prihoda u 2001. godini (koji je iznosio 3.736.039 KM). U strukturi prihoda i ove godine dominiraju takozvani porezni prihodi sa 49,30%, neporezni prihodi iznose 35,18% i tekuće potpore 14,52%. Budžet općine je dosta prenapregnut i ambiciozno projektovan. Koliko je realan, praksa će brzo pokazati. Osim Budžeta i nekoliko drugih "izvještajnih i dežurnih tačaka", na ovoj sjednici vijećnici su usvojili Program kulturnih aktivnosti u 2002. godini. Predviđeno je održavanje Festivala dječjeg dramskog stvaralaštva, na kojem će nastu-

piti učeničke dramske grupe iz cijele BiH. Time se Gračanica ponovo vraća atribut festivalskog grada. Da podsjetimo: Gračanica je, svojevremeno, bila domaćin i suorganizator poznatog Festivala amaterskih dramskih pozorišta BiH, a nešto kasnije i Festivala dječje drame.

10. 3. 2002.

### **"Sa pismenog ispita pravo u smrt": stravičan saobraćajni udes nadomak Zenice, poginule četiri studentice s područja općine Gračanica.**

U tom tragičnom udesu, na licu, mjesta u vozilu "Fijesta" stradale su vrijedne nastavnice, koje su studirale uz rad engleski jezik na Mostarskom univerzitetu: Armina (Emina) Begović-Ibrišević (1969.) iz Stjepan Polja (iz prognaničke porodice iz Dervente) i Edina (Ragiba) Šestan (1978.) iz Donje Lohinje, dok je na putu za bolnicu preminula Melisa Nezirović (1980.) iz Gračanice. Za vrijeme operacije, preminula je i Adaleta (Sakiba) Bašić (1977.), takođe iz Gračanice. Sa njima je bila i Samila Selimović, za čiji se život još uvijek bore u bore ljekari u zeničkoj bolnici. Velika tuga na čitavoj općini...

14. 3. 2002.

### **Male etnološke zbirke u Sokolu i Klokočnici**

Prikupljanjem starih etnoloških predmeta i narodnih rukotvorina godinama se bave Mustafa Topčagić u Sokolu i Nisvet Mujkić u Klokočnici - kao zaljubljenici starina, entuzijasti, vrijedni domaćini, ili pomalo od svega toga. Posjeduju zanimljive zbirke starina, koje izlažu kod svojih kuća, sređuju, čuvaju, ponešto prodaju. Kako piše Hasan Čalić u "Dnevnom avazu", Mujkić je već opremio pravu etnološku zbirku. To je bosanska soba u kojoj je djevojačko ruho, kalupni jastuci, jam-

bezi... Možemo li entuzijazmom nadoknaditi ono što bi trebalo da urade neki zvanični "kulturnjaci"...

27. 3. 2002.

### **Dvadeset prva sjednica Općinskog vijeća Gračanica: ambiciozan plan kapitalnih ulaganja u 2002. godini**

Sredstva u iznosu od 1.537.112 KM obezbijedena su iz sljedećih izvora: Javno preduzeće za vodno područje "Slivovi rijeke Save" iz Sarajeva, Ministarstvo poljoprivrede, šumarstva i vodoprivrede TK, Direkcija voda TK, Direkcija za puteve TK i općina Gračanica. Uložena u rekonstrukciju putnih pravaca ("marka na marku"), u regulaciju rijeke Sokoluše, izgradnju zamjenskog bunara za gračanički Vodovod na lokaciji Sklop itd. U 2002. godini planirana su ulaganja u iznosu od 3.666.457 KM u saniranje puteva ("marka na marku"), vodovodnu mrežu, saniranje klizišta, odlagališta smeća itd. To je zbir planova svih 18 postojećih mjesnih zajednica, koji će se realizovati u 21 naselju općine (uključujući i Gornju Lohinju, Lendiće i Skipovac).

Posebnu pažnju vijećnika ovoga puta privukla je informacija o stanju zaposlenosti na općini, o sigurnosnoj situaciji, o sportu i fizičkoj kulturi, o problemima i mjerama na suzbijanju opojnih droga, te izvještaji o radu javnih preduzeća "Vodovod i kanalizacija" i "Komus".

1. 4. 2002.

### **Dvadeset godina "Kokaprodukta": to je danas potpuno privatizovana firma sa jasnom perspektivom razvoja**

Prije zvaničnog formiranja i registracije tadašnje Osnovne organizacije udruženog rada (OOUR) "Kokaprodukt", 1. 4. 1982. godine, u okviru tadašnje Radne organiza-

cije "Trgoproduct" već je postojala potrebna infrastruktura za dalji razvoj peradarstva. Izgrađena je inkubatorska stanica i roditeljska farma sa drugim pratećim kapacitetima u društvenom sektoru, te dvadesetak privatnih farmi za tov pilića, koje su izgrađene iz kredita takozvanog "Zelenog plana". Samo najveći optimisti i vizionari vjerovali su u budućnost te proizvodnje, ali to je već historija...

9. 4. 2002.

### **Iako su im kuće i stanovi vraćeni, povratak Srba u općinu Gračanica ne odvija se prema očekivanjima**

Kako piše Hasan Čalić, dopisnik "Dnevnog avaza" iz Gračanice, do sada se u Lendiće, i pored na desetine praznih srpskih kuća, vratilo samo Nikola Đurić sa suprugom, u Donju Lohinju vratile su se samo tri porodice, u Gornju Lohinju ni jedna. U sam grad vratilo se oko tridesetak srpskih porodica, ostali rijetko posjećuju svoje stanove i kuće, prodaju ih ili izdaju pod kiriju. U Gornju Lohinju još se nije vratio ni jedan predratni stanovnik. Ključevi njihovih praznih kuća čekaju ih u odgovarajućoj općinskoj službi u Gračanici. Veći interes za povratak izrazili su nekadašnji mještani zaselaka Brđani i Kojići (Donji Skipovac), koji se nalaze "s ove strane dejtonske linije".

16. 4. 2002.

### **Gračanički slikar Niaz Omerović: izložba crteža i slika u BKC Tuzla**

Izložba se sastoji od pet ciklusa: *Historija iluzija*, *Entropija*, *Dijalog civilizacija*, *Savremenici* i *Posvećeno Ešeru* (Ešeru). U Niazovim slikama žive praslike prošlosti i slutnje budućnosti. Raznorodne elemente unutar jedne slike-crteža znalačkim postupkom assemblage, strip, pomjerenom perspektivom ili stepenovanjem prostora - drži na okupu autorska ideja, da se radi o ugroženim i napadnutim vrijednostima, da se radi o suštini koju treba zaštititi, kao osnovu bošnjačkog-ljudskog pamćen-

ja i duhovne vertikale. Ciklusi crteža realizovani su na blagoj parodiji-ironiji i zasnivaju se na nekoliko bitnih elemenata. Prije svega, tu je istorijsko osjećanje, precizan crtež, smisao za kompoziciju i osjećaj za arhitekturu, ističe se u Katalogu izložbe.

17. 4. 2002.

### **"Fortuna" Gračanica: 80 novih radnika**

U ovoj mnogoljudnoj gračaničkoj firmi prošle godine zaposlenje je našlo 120 novih radnika. Nakon dvomjesečne obuke (koja je u toku), posao u "Fortuni" dobit će još 80 radnika sa Biroa za zapošljavanje.

26. 4. 2002.

### **Dvadeset druga sjednica općinskog vijeća: zdravstvene službe na općini dobile pozitivnu ocjenu**

Usvojene su i odluke o odvodu i prečišćavanju otpadnih površinskih voda na području općine, o horizontalnoj i vertikalnoj saobraćajnoj signalizaciji, o broju i vrsti općinskih priznanja itd. Bez primjedbi je, između ostalog, usvojena i informacija o privrednim kretanjima na općini Gračanica u 2001. godini, o vršenju inspekcijskog nadzora, o radu Gradske apoteke itd.

30. 4. 2002.

### **Nove količine vode u gračaničkom vodovodu**

Puštanjem takozvanog zamjenskog bunara, dubine 165 metara, na lokalitetu "Kamenolom Pašalići", osigurano je 30 litara vode u sekundi, čime je osigurana stabilnost u sistemu vodosnabdijevanja Gračanice vodom za narednih nekoliko godina. Riječ je o investiciji od oko 200.000 KM koja se finansirala iz kantonalnih i općinskih izvora. Slijedi rekonstrukcija izvorišta i bazena Seljanuša, te dalja istraživanja izvorišta pitke vode na općini.